



DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ

Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS

*manè discutienda, in Scholis Medicorum, die Jovis decimâ
Decembris anni M. DCC. XXXIII.*

M. ACHILLE - FRANCISCO FONTAINE,

Doctore Medico, Præside.

An Alvi diuturno Fluori Vomitus?

I.



DIARRHŒA partium nutritioni inservientium vitia consequitur : à læsâ coctione non rarò ortum ducit : interdum à relaxatis ventriculi & intestinorum fibris : sæpè à bilis exundantis copiâ, quæ intrâ proprium conceptaculum, vesiculæ scilicet felleæ cavitatem, contineri nequit. Illa siquidem acri ejusmodi

succo, & ad nutriendum inepto, frequenter onerata & sollicitata, hunc etiam frequenter in duodenum expuit. Sæpè etiam à plurimâ illuvie serosâ è visceribus & mesenterio in intestina depluente alvi fluor proficiscitur. Hinc excrementa liquidius effluere sinunt. Quin etiam crassiori bile infarcti meatus Biliares, viscidâque & abundantiori pituitâ obfessa mesenterii vascula, tum chyli ingressum in lactea, tum etiam bilis quotidianum effluxum impediunt; unde aliquandiu detenti isti humores, postea in intestina ruunt, & per sedem crebrò exonerantur.

I I.

VENTER, velut oceanus, omnibus corporis partibus dat, ab omnibus accipit; in ipsius alveum, tanquam commodeiorem viam, foras eliminandi, è cunctis ferè colatoriiis noxiis devehuntur humores; hinc adeò frequenti diarrhœa vexamur, quæ non à solo ventriculo, sed etiam à cæteris alvinæ regionis partibus originem trahit. Primum quidem succi, à naturali statu degeneres fiunt; qui partim pravâ suâ qualitate, partim nimia copiâ, ora vasorum ad ventriculum pertinentium distendunt & referant, ex quibus in hujus cavitatem illabuntur; ibique huc illuc à calore agitati membranas feriunt & vellicant. Hinc corpus languet, & diarrhœa torquetur, si liquor gastricus, propter pravam sanguinis temperiem, & vitiosos humores ipsi admixtos, segnis & insulsus adeo evadat, ut cibi diutius in ventriculo morantes putrescant; sin autem calore nimio acrimoniam vel amarorem acquirat, has qualitates tum chylo, tum alvi excrementis imprimit. Insuper in ventriculo congeruntur mucosæ quædam fordes, quæ ipsius tunicis pertinaciùs adhærentes succum salivalem coercent, ipsiusque energiam adeò obtundunt ut digestionem ineptus evadat. Hinc crassior chylus postmodum subire vasa lactea non potest; nec ampliùs illius particulæ debitam fluiditatem obtinent, quâ vasorum ad intestina hiantium ostiola perreptare valeant; idèò motu peristaltico protruduntur versùs podicem, ac lientericum & chylosum alvi profluvium succedit, cui sæpè vomitu nullum presentius remedium.

I I I.

VALIDA vomitus concussione, natans in ventriculo impuritas, vel ejusdem villis affixa & altius recondita, tutò &

citò avellitur & ejicitur. Quādiu perseverat vellicatio, aqueus liquor è vasorum lymphaticorum extremis foraminulis exprimitur; atque etiam dum simul cum ventriculo duodenum concutitur & subvertitur, bilis quasi manu compressa è suis latibulis exilit & sursum retrahitur. Eādem irritatione, humores corrupti è totā massā sanguineā stomachum appellant. Vomitus ope & beneficio sanguis expurgatus & defaecatus acrem suam qualitatem exuit ac deponit: excrementa suis locis & pristinae naturae restituntur; dissolutae ac laxatae fibrae jam robur accipiunt, spiritus quoque, qui prius quasi submersi videbantur, jam vegeti & alacres superflui humoris reliquias resolvunt & dissipant.

I V.

NATURAE injuriā facit, quisquis vomitum ipsius instituto & legibus contrarium affirmat. Hāc salutarī excretionē non modò febres, sed etiam alios morbos spontē persanat; eo fine vias breviores & in ventriculum magis expeditas quā in alvum, natura fabrefecit; per quas è vicinis locis materia morbum committens expelleretur. Vomitus vel universalis, quo non modò è ventriculo, sed etiam è visceribus ipsis atque ex universo corpore noxiū humores utilissimè expelluntur: Vel particularis, quo solus expurgatur ventriculus; hōc vetustissimi Aegyptii tribus diebus continuis, quovis mense, utebantur. Universalis longis morbis confert, Emeticorum enim vis divellit humores ipsosque partibus insidentes excutit. Nec tantum solius vacuationis, sed etiam revulsionis gratiā vomitus celebratur. Hinc aliquandò in pertinaci dysenteria exhibitum ipecacuanha licet neque Emetism neque Catharsim provocet auctā diaphoresi dirum illud symptoma fugare observatur.

V.

MOCHLICI usus & administratio magnam prudentiam & multas cautiones in Medico requirit. In quibusdam adeo debilis est ventriculus & infirmum pectus, ut ab emetico vires statim exolvantur: aliis non facile primum ciatur vomitus, sed ubi simul inceperit, difficillimè sedatur. Cum fervida viscerum intemperies alvi fluxum fovet, validissimo medicamento nihil perniciosius: blandiori cathartico res peragi debet, ut cassia cum theo aut confectioe universali, quibus diarrhoea plerumque ce-

4

dit, post venæsectionis cum ratione repetitæ & refrigerantium
 usum. Sin autem in intestinorum anfractibus nimis diù cespitans
 humor blandiorum vim hæcenus eluserit, emetico tandem ex-
 cludi debet, modò nulla dispositio inflammatoria, nullum ~~ædema~~
 sub cineribus intus lateat. Illud humorem noxium è suis sedibus
 facîle elicit, quem cætera cathartica deturbare non possunt. An-
 tiquas jecoris, lienis, pancreatis & mesenterii obstructions validâ
 concussionè solvit, atque etiam humoris in inferam alvum ruen-
 tis cursum sic revocat, ut mutatâ velificatione in superas partes
 révellatur & ore rejiciatur; naturæ ipsius ductu & exemplo, quæ,
 si vomitus suâ sponte successerit, diuturnâ diarrhœâ ægrum li-
 berat.

Ergo Alvi diuturno Fluori Vomitus.

DOMINI DOCTORES DISPUTATURI.

- | | | |
|---|---|---|
| <i>M. Ludovicus - Petrus le
 Hoc, Consiliarius Medi-
 cus Regis ordinarius in
 ejus Castellæto.</i> | <i>M. Joannes-Baptista Boyer.</i> | <i>M. Michael-Procope Con-
 teaux.</i> |
| <i>M. Antonius-Nicolaus Gue-
 nault.</i> | <i>M. Desiderius - Claudius
 Fremont.</i> | <i>M. Joannes - Claudius -
 Adrianus Helvetius, Re-
 gi à Sanctionibus Consti-
 tius Reginaque Medicus
 primarius, & è Regiâ
 Scientiarum Academia.</i> |
| <i>M. Paulus-Jacobus Ma-
 loun.</i> | <i>M. Bernardus de Jussieu,
 Regia Scientiarum Aca-
 demie Regiæque Socie-
 tatis Londinensis Socius,
 & in Horto Regio Bota-
 nices Prodemonstrator.</i> | <i>M. Claudius du Cerf.</i> |

Proponebat Parisiis HENRICUS - FRANCISCUS
 BOURDELIN, Parisiensis, Baccalaureus Medicus,
 A. R. S. H. 1733. à sextâ ad meridiem.